

Plenchi

Bèl a bati

**TRINGG TRINGGG bèlèm..... TRINGG TRINGGG bèlèm.....ban
subi plenchi 2018-2019.**

**Nos ta felis ku un aña eskolar nobo. Un aña mas ku Tata a regalá nos di
bida i salú pa nos traha na bienestar di Korsou.**

**Nos di RKCS a habri aña ku nos konferensha pa tur personal. Tabata e
di 20 konferensha di RKCS. E promé konferensha, 20 aña pasá, tabata
riba inisiativa di e funshonario Lucien Larmonie. Su vishon i
dedikashon pa ofresé kursonan di rekapasitashon pa personal a sigui
inspirá esnan ku a sigui ku su vishon. Danki Lucien Larmonie. Un
danki speshal ta bai e aña aki atrobe pa e tim organisador bou di
kordinashon di Diana Maduro. Su tim ku ta konsistí di, Imro van
Wilgen, Monnie Vornis, Jacqueline Cyntje, Irma Philbert, Suzan Kwas,
Shahaira Angelo i Mirugia Martina a hasi bon trabou.**

**Na tur personal di RK ku a traha duru, na sponsernan pa e regalonan,
na nos Mgr. Luis Secco pa un bunita mensahe, na Pastor Morrison pa
su palabranan inspirativo.**

**Danki speshal na nos 2 keynote speakers ku ta Eldrion Regina i Yithza
Davelaar ku a sa di toka kurason i mente di presentenan. E
evaluashonnan di e aña aki ta papia pa nan mes, un promedio di 4.6
riba un skala di 1 pa 5.**

**Ian Sille a hasi un trabou formidabel ku zonido i lus pa trese un
ambiente profeshonal pero cozy. Manera semper Anuar, a soru pa nos
tin tur e presentashonnan dokumentá na un manera profeshonal.**

**Danki na tur presente, invitadonan i speshalmente nos personal pa habri
aña huntú, pa nos por inspirá i selebrá ku Tata a regalá nos un aña mas.
Por último, danki na esnan nos ta traha na nan bienestar, nos hóbenan.**

**Nan tabata bon representá den e kor di St. Margaretha ku nan bos
angelikal, nan spontanidat i kurason agradesido. Tambe na hóbenan
di st. Ignatuis College ku a demostrá talento produciendo músika for di
nan propio material resiklá. Nan ta ehempel di talento i kreatividat.**

Koleganan ban Dream big, be creative and take action. Ban pé.

E aña aki kada siman nos lo sera konosí di aserka ku un skol di nos.

**Ban konosé otro su soñonan, su metanan i su logronan. No ta pòrnada
nos ta kuminsá ku Coromoto College, lesa pa bo ta informá.**

Riba roster

Awe Coromoto College ta riba plenchi. Ban sera konosí ku e skol aki.

LA BIRGEN DI COROMOTO



Historio kòrtiko di nos patrono

La Birgen di Coromoto, ta data di un echo real, ku a sosodé na Venezuela 8 di sèptèmber di aña 1652. La Birgen Maria a aparesé dilanti e indjan yamá Coromoto. Coromoto tabata hefe di e tribu. La Birgen a pidi Coromoto i su hendenan pa nan konbertí i batisá. Vários di e indjannan a konbertí i batisá pero Coromoto tabata tèrko i no a hasi esaki. La Birgen a bolbe aparesé dilanti di Coromoto. Coromoto a rabia i hisa su brasa pa tene La Birgen pero pa su sorpresa e imágen ta disparsedi dilanti i ta materialisá den un prenchi. Coromoto ta hui bai den mondi pero apenas e ta yega , un kolebra venenoso ta mord'é. El a mira esaki komo un kastigu di shelu pa e moda sin rèspèt ku el a trata e aparishon di La Birgen. El a sinti duele i a desea di ser batisá. Milagrosamente e ta keda salvá i ta konbertí den un apòstel.

Alumnonan di Coromoto College a asistí djaluna 3 di sèptèmber na e nobena di La Birgen di Coromoto. 10 alumno a resa Ave Maria durante e misterionan i a sòru pa e interseshon nan na honor di La Birgen Maria i tambe pa ofrenda



**Not'é riba bòrchi
Na kabuya bieu ta konopá nobo.**



Ta un plaser di forma parti di un otro tim motivá ku ta traha na desaroyo di nos muchanan.

E posishon aki ta presentá algun eksperiensa nobo i eksitante pa mi. Promé di a forma parti di tim di Coromoto College, mi a finalisá mi estudio Master Onderwijskunde na Nijmegen. Den mi karera mi a akumulá eksperiensa na vários skol basiko, instituto di enseñansa i universidat na Kòrsou den un esfera kolegial.

Banda di mi pashon pa yuda desaroyá nos hobennan, mi ta gusta baila, fotografia i chukulati. Mi gusta chukulati asina tantu ku e muchanan a honra mi ku e nòmber yùfrou Chukulati.

Lokual ku mi a siña di bida ta ku dos di e forsanan importante den un mucha su bida, ta un relashon hopi serka ku Dios i sosten di su mayornan. Un danki grandi ta bai na nos Tata Todopoderoso, mi mayornan i tur ku a sostené mi. Vishon pa Coromoto College ta pa traha huntu ku e tim di maestro, muchanan, mayornan, direktiva i komunidad riba desaroyo kognitivo, spiritual, sosial, emoshonal, físiko, kreativo i teknológiko di nos muchanan! Lokual ku ta bon, nos ta mantene i hasie mas miho uzando eksperiensanan di mi huntu ku tim di Coromoto College. Na kabuya bieu ta konopá nobo.

Yùfrou Niëlca Lichtenberg
Direktor Coromoto College

Den agènda

5 oktober dia di dosente

10 oktober dia di pais Korsou

Fakansi di skol

8 oktober te ku 12 oktober

21 desember te ku 4 yanuari

Riba rapòrt

Eksito di grupo 8 Coromoto College 2017-2018

Na final di aña eskolar 2017-2018 100% di alumnonan di grupo 8 Coromoto College a pasa pa skol avansá. 46% a pasa pa Havo i 54 % a pasa pa VSBO. E resultado akí ta fruta di trabou duru entre tim di Coromoto College, alumnonan, mayornan ku ta aportá na nos skol kontinuamente pa mehorá nos kalidat di enseñansa. Maestranan di grupo 8 ta duna “EFO-training” despues di skol p’asina alumnonan kustumbrá ku e kontenido di EFO. Trabou duru ehekutá ku hopi amor i plaser ta duna bon fruta! Coromoto College e komienso pa un bon mañan!

Mi ta konta



Bo tabata sa ku.....

Coromoto College tin un total di 377 alumno...

Yùfrou Carla a hasi 40 aña den servisio hasiendo un tremendo trabou di forma nos muchanan.....

Coromoto College su tim ta konsistí di 30 persona....

Yùfrou Niëlca gusta saka potrèt i gusta kome chukulati....

Coromoto College tabata ta un meisje-school.....

Tur luna ta saka alumno di luna di kada klas...

Yùfrou Shamila gusta baila.....

Yùfrou Galathy gusta un bon papaya stobá.....

Un prencipi

Coromoto College a hasi apertura di Siman di seguridat den tráfiiko

Dia 19 di ougùstùs tabata dia nashonal di Transporte públiko i durante henter e siman aki Kòrsou a dediké na pone atenshon na seguridat den tráfiiko. Sra. Zita Hesus- Leito minister di tráfiiko, transporte i planifikashon urbano huntu ku sra. Marilyn Alcalá- Walle minister di enseñansa, siensia, kultura i deporte a bini nos skol pa hasi e apertura ofisial di e siman aki huntu ku nos alumnonan. Durante e mainta aki minister a papia di algun regla di tráfiiko i a duna skol un foyeto ku tur e informashonnan pa tene kuenta kune den tráfiiko. A pone atenshon na algun di e reglanan ku mester tene kuenta kuné den tráfikopòr ehempel no pasa den lus kòrá, respetá peaton, no papia na telefòn mientras ta stür, bisti faha di seguridat, ets.

Komo skol tur maestro a tuma e siman aki pa pone atenshon na tur e reglanan aki i hasi diferente tarea ku e alumnonan.



Mucha djispou

Margaret: “Kon ta Suzan, hopi tempu. Ki trabou bo ta hasi?”.

Suzan: “Wel ami ta inventor”.

Margaret: “Ehe bon hopi bon, nos por spera yen invenshon anto!”

Suzan: “Si ya ma inventá telefon, email, lus, hopi kos importante.

Margaret: “Awel bo ke men pa sigui speshalisá den inventá mentira.”